

# SA PAZINA 'E SA POESIA

de Tonino Sanna

*Zuanni Antoni Piras*, custu su nomene chi bi han postu in su batesimale, ma dae totugantos connottu commente Fine Piras, est naschiu in Domusnovas Canales - una pitica frazione de sa idda 'e Norbello (anticamente Norghiddo) - sa die duos 'e Nadale millenoighentos. Est benniu a bivere a Sedilo a poi chi s'est isfudau e torrau a cojuare.


Amigu e connau de su poete Zuanne Tanda, s'iscridiana sempere in versos sardos.

A motivu de sa vida trubulada c'had'attraessau, sas cumposiciones poeticas chi had'iscrittu ziu Fine Piras suni unu pagu isanimaiolas, commente nos ammentan sas terzinas de sa poesia sorte mala:

Sarughechim'hanzaduintrosacresia

Fit a mi la trazare fitianu.

Biviu in Toscana bellecantu noe annos est torrau a Sedilo a sa fine de su millenoighentosessantano, inu'est mortu su bindighi de marzu mellenoighentossettanta.



## A Franziscu X - De Sedilo

*Chi m'iscriet da Ortigale, pregandemi a li paralimpare una giovane Sedilese.*

Caru Franziscu oe apo rezzidu  
S'expresso chi m'has fattu in Bortigale,  
E arrivadu m'est tantu gradidu.

Però su legger chi la passas male  
Mi dispiaghet caru paesanu  
Ma cumprendo ch'es giustu e naturale

Essende como in pienu eranu  
Tantu puleddos, coment'e mazolos  
Sun furiosos che un'uraganu.

Massimu cuddos chi vivene solos  
Cand'es su tempus de fagher s'amore  
Han resone de haer'oriolos.

Su mes'e maju, est s'unicu fattore  
Chi dada a ogni essere vivente  
Forza, coraggiu, energia e calore.

Ma resu m'has cumovidu e dolente  
In su modu ch'imbolas'a s'aera  
Tantu lamentu cun dolore ardente.

Coraggiu! Ch'est sa tua primavera  
E bessit pro te puru s'aurora  
Si has costanzia e fide sinzera.

Si una Dea no tenes ancora  
Non t'ispantes pro cussu, ista seguru  
Chi cantu prestu nde te benner s'ora.

Coraggiu! Ca t'aggiudo deo punì:  
Si ses dispostu su riu a passare  
Mancar'in nott'e tronos 'e iscuru.

Non ti lu potto s'aggiudu negare  
Pro cantu mi lu pedis lamentosu  
A costu ch'anneghemus conc'a pare.

Però forte ti cherzo e coraggiosu  
E i sa paura poninde in disprezzu  
Sias de bincher solu isperanzosu.

Bastat chi non la pighes a ischerziu  
Sa giovano ch'in mente ti has preffissu  
Ca non si dat su coro a vile prezzu

Si fidel'e costante istas'e fissu  
Tenindetila in sinu riservada  
Triunfas e supèras ogni abbissu.


Cun sa tua columba immaculada  
Mi paret già unidu chi ti bida  
In mesu a tanta gioia sobrada.

Duncas allegru passadi sa vida  
Ch'est feu in su fiore de sus annos  
A giugher gai s'anim'avvilida.

Non t'alimentes de sos disingannos  
Ma sognende unu floridu avvenire  
Iscazza cussas penas e affannos.

E faghe s'isperanzia fiorire  
Senza mai de animu mancare  
Deves cun calma sa via sighire.

Si a s'intentu cheres arrivare.



## Ischerziu - pro unu libru prestadu

*Rima bernasca — isterrida ammontada*

Bae in bonora! A non l'haer'ischidu,  
Chi fisi un'imboglione patentadu,  
Non ti l'haia su libru prestadu,  
Già chi ti faghes padronu 'e s'anzenu.

Imbrogliadu mi has troppu in pienu,  
Cuss'agire ti fattat bonu proe!  
Beru, sa vida est morta a dies d'oe,  
Però de te non mi l'ispettaia.

Pro pagas dies l'has pedidu ebbia,  
E c'hat passadu invece duos annos!  
Cun rairos, cun trampas e ingannos,  
Gasi sa zente truffas e camorras.

Però si prestu su libru non torras,  
Iscandalu ti fatto manifestu,  
Deu so bonu, so calmu e onestu,  
E non permitto s'imbrogliu e s'abusu.

Già chi su libru postu has for'e usu,  
Unu nou nde debes comperare,  
E cantu prima, mi lu dèss torrare,  
Si cheres chi cabelle su rancore.

Beni punì ch'est pagu su valore,  
Però non potto soffrire s'offesa,  
Pro cantu has committidu sa vilesa,  
Toccat a tie a bi ponner riparu.

Pro pagos francos non sias avaru,  
E deo ponzo su fattu in olvidu,  
Cando su libru m'has aer torrada.

Bai imbonora! A non l'haer'ischidu,  
chi fisi un'imboglione patentadu.

Agosto 1965 Trequanda Siena